

## ASUNTU NE'EBÉ PRESIZA TAU ATENSAUN

- ▶ **Lista insidente ne'ebé a'as liu desde fulan Abril 2012**
- ▶ **Taa malu entre membru comunidade tanba hadau malu rai**
- ▶ **Joven mane nain rua diskuti malu to'o ikus sona malu**
- ▶ **Haksesuk malu tanba animal tama to'os no to'os nain oho mate tiha animal**

### Relatóriu insidente ne'ebé a'as liu desde fulan Abril 2012 no kompara ho fulan Setembru 2014

Iha fulan Setembru 2014, número insidente ne'ebé a'as iha tinan ne'e total insidente 103. Nomos desde Abril 2012 total insidente a'as liu iha insidente 117. Fulan ne'e hanesan fulan ne'ebé realiza eleisaun Presidente ba segundu ronde. Agora dadaun, número insidente a'as liu relasiona ho número insidente a'as iha Oekusi (kona-ba rai, animal no disputa fronteira) no insidente a'as liu husi número mediu akontese iha Likisá no Vikeke.

### Taa malu entre membru comunidade tanba hadau malu rai

Iha dia 18 Setembru 2014, Iha Aldeia Hauhei, Suku Koliata Letelu, Subdistritu Hatolia, Distritu Ermera. Insidente akontese mane kaben ida taa mane kaben ida seluk ho nia oan mane, tanba hadau malu rai. Rai ida intrega ona husi vizifū ba família ida ho ninia oan, iha tempu pasadu. Tanba ne'e, mane kaben ida seluk ho ninia oan mane idade 16 anos ba hamo'os to'os refere. Iha tempu hanesan, mane kaben ida mai hamo'os hela to'os, halo mane kaben seluk ho ninia oan ne'e konfusaun. Tanba sira konfusaun, entaun mane kaben ida seluk ho ninia oan nomos ninia subriñu ba bolu kableha hodi hatudu mane kaben ida ne'ebé hamos fali to'os, ne'ebé konsidera sira nian. Bainhira kableha ho mane kaben ida seluk ho ninia oan to'o iha to'os ne'e, mane kaben ida ne'e hana kedas sira ho rama mais lakona. Tanba lakona, entaun nia mai hasoru de'it ona ho katana no konsege taa mane kaben ida seluk, no nia oan kona iha parte hirus matan. Rona nia oan hakilar hetan taa, mane kaben ida seluk ne'e mai salva nia oan, mane kaben seluk mós hetan taa iha parte rentos. Mane kaben ida seluk ne'e mai halo asalta fali mane kaben ida ne'e ho katana no konsege taa iha nia liman karuk no kanuruk.

## REVISTA SITUASAUN SETEMBRU 2014

Depois mane kaben ida seluk ho ninia oan konsege halai subar fali iha Suku Hatugau, Subdistritu Letefoho. Hafoin iha dia 19 Setembru 2014 dadersan, PNTL ho família husi mane kaben ida seluk ho ninia oan, no autoridade lokal sira ba buka mane kaben ida ne'e, hetan iha ai-laran ho kondisaun kanek todan. Polisia lori kedas nia mai Ospital Ermera hodi halo tratamentu maibé la konsege no hakotu is/mate iha dalan klaran. Mane kaben ida seluk hó nia oan lori kedas ba halo tratamentu iha Ospital Nasionál Guido Valadares Dili. Impaktu husi problema ne'e mak rezulta ema mate ida no kanek todan nain rua. Insidente ne'e to'o agora seidauk rezolve.

Insidente kona-ba disputa rai iha fulan Setembru 2014 hamutuk 14 (Oekusi 5, Lautein 3, Aileu 1, Ainaru 1, Dili 1, Ermera 1, Manufahi 1, Likisá 1), iha fulan Agostu 2014 iha insidente ida deit.

### Joven mane nain rua diskuti malu to'o ikus sona malu

Iha dia 11 Setembru 2014, iha Aldeia Metina, Suku Lahane Oriental, Subdistritu Nain Feto, Distritu Dili, akontese insidente joven mane ida sona joven mane ida seluk. Insidente ne'e hahu husi joven mane nain rua diskute malu, lakohi simu malu no hotar malu ho liafuan maka'as, to'o ikus mane joven ida seluk foti kedas tudik hodi sona joven mane ida seluk iha nia kotuk klaran hodi rezulta kanek no ran fakar. Hafoin ida ne'e joven mane ida sona nia joven maluk ne'e, halai husik fatin insidente, maibé la kleur Polisia to'o fatin insidente hodi kaer kedas joven mane ne'e, hodi hatama kedas iha Sela Caicoli durante 24 oras no joven ne'ebé hetan sona, ninia família lori kedas ba baixa iha Ospital Nasionál Guido Valadares Dili. Fontes verifika tan, katak agora dadaun joven hetan sona ne'e alta ona husi Hospital no fila ba ninia uma. Insidente ne'e registu ona iha Ministeriu Publiku maibé sidauk prosesu to'o agora. Impaktu husi insidente ne'e mak parte família rua nia relasaun ladiak ba malu nomos halo comunidade sira tauk.

Insidente ne'ebé autor mak joven maske ninia abut problema lahanesan hamutuk 34 insidente iha fulan Setembru 2014. Iha mos insidente seluk ne'ebé hun no abut konflitu liga ba joven sira uza alkol no lanu hodi hamosu konflitu hamutuk 14 insidente.

### Haksesuk malu tanba animal tama to'os no to'os nain oho mate tiha animal


Iha dia 7 Setembru 2014, iha Aldeia Buqui, Suku Usi Tasae, Subdistritu Oesilo, Distritu Oekusi, akontese insidente diskuti no haksesuk malu entre to'os nain ho animal nain. Insidente hahu husi animal nain mak halo ba to'os nain. Motivu husi insidente ne'e mak tanba animal (fahi) tama to'os laran no han, estraga plantasaun, entaun to'os nain oho mate tiha animal refere iha to'os ne'e kedas.

Totál insidente Fulan Setembru 2014	
Distritu	Insidente
Aileu	3
Ainaru	6
Baukau	8
Bobonaru	2
Covalima	4
Dili	25
Ermera	4
Lautein	3
Likisá	10
Manatuto	2
Manufahi	6
Oekusi	20
Vikeke	10
<b>Totál</b>	<b>103</b>


Fahi nain rona insidente ne'e no mai halo kedas asalta verbal, tarata malu iha to'os tanba fahi nain pruntu atu selu multa mais laos oho animal. Tamba liafuan lasimu malu entaun, kamunidade balun ba bolu lia nain hodi tesi lia ba sira nia problema. Hetan duni akordu katak to'os nain sei selu fila fali fahi ne'ebé mate no nain ba animal fahi hetan multa 10.00 USD hodi rekopera ai horis hetan estragus tanba animal ne'e. Problema rezolve kedas iha fatin no iha loran hanesan. Impaktu husi insidente ne'e mak animal ida mate nomos to'os nain selu fali fahi moris id aba fahi nain.

Insidente haksasuk malu tanba animal tama to'os ne'e hatudu a'as liu no akontese deit iha Distritu Oekusi hamutuk 9 insidente iha fulan Setembru 2014.


### KARATERÍSTIKA INSIDENTE




### Insidente Fatin




### Tipu Violensia





### Metodu Violensia



### Se Mak Hahu / Halo Violensia





### ATIVIDADE PREVENSAN NO RESPONDE BA KONFLITU

#### Atividade ne'ebé Realiza husi Ekipa Demokrasi no Dezenvolvimentu liuhusi Asaun Media no Hakbi'it (DAME):

► Hala'o atividades Radio talkshow hodi konvida representante Rede Prevencaun no Responde Konfliktu (RPRK), hodi participa iha Radio Talkshow hamutuk ho Representante Belun hodi koa'lia kona-ba, Kna'ar RPRK ba prevencaun konfliktu no harii dame hanesan parte ida atu dizemina informasaun kona-ba RPRK nia atividade, nomos fahe rezultadu xave relatóriu peskiza husi programa DAME kona-ba rede nia papel iha transformasaun konfliktu iha Timor-Leste. Atividade hirak ne'e fasilita diretamentu husi Kórdenador Distritu Belun. Iha fulan Setembru 2014 realiza iha distritu tolu hanesan:


- Talkshow iha Radio Komunitade Iliwai Manatuto, iha dia 23 Setembru 2014, oradores husi eis Pontu Fokal RPRK Subdistritu Manatuto, Xefe Suku Aiteas, Komandante Polisia Operasaun no Peskizador programa DAME.
- Talkshow iha Radio Komunitade Raiusar Aileu iha 25 Setembru 2014, oradores husi Pontu Fokal RPRK Subdistritu Aileu (hanesan mos CDO Subdistritu Aileu), Xefe Suku no Peskizador programa DAME.
- Talk show iha Radio Komunitade Tokodede Likisá, Distritu Likisá iha dia 18 Setembru 2014. Fontes ka oradores sira mai husi Pontu Fokal RPRK Likisa hanesan mos atual Administrador Subdistritu Likisá, Xefe Suku Dato, PNTL no Peskizador DAME.



#### Se Mak Vitima Nia Jeneru



#### Hun no Abut Konfliktu



### Atividade Ne'ebé Hala'o Husi Ekipa Atensaun no Responde Sedu (AtReS)

- ▶ Rede Prevençãun no Responde Konfliktu (RPRK), realiza atividade Tara Bandu iha Subdistritu Hatu-Udo, Distritu Ainaru iha dia 2 Setembru 2014. Atu minimiza konfliktu iha comunidade hanesan hadau malu rai, animal tama to'os estraga plantasaun, tesi ai arbiru no problema violénsia domestika. Tan ne'e, Suku rua (Suku Foho-Ailiku no Suku Leolima) husi Subdistritu Hatu-Udo desidi atau tara sira nia bandu, liu husi konsultasaun no socializasaun durante fulan 6. Partisipante kuaze 500 pesoas participa seremonia ne'e husi Xefe Suku nain rua no Xefe Aldeias 16, lia nain no husi autoridade governu lokal hanesan Oradores husi Terras e Propriedade, Polísia Nasionál Timor-Leste (PNTL), Diresaun Florestal Distritu Ainaru, Administrador Subdistritu Hatu-Udo, Adjuntu Administrador Distritu Ainaru sai hanesan sasin ba bandu ne'ebé comunidade Hatu-Udo deklarara ona.
- ▶ Treinamentu Transformasaun Konfliktu Modul 3 ba monitors iha dia 10-12 Setembru 2014 hala'o iha Edifisiu Belun Dili. Partisipante hamutuk 14 pesoas, feto nain 8 no mane nain 6. Objetivu importante husi treinamentu ne'e mak atau hasae kapasidade monitor AtReS nian iha area analiza konfliktu liu husi instrumentu oi-oin. Kapasidade balun mos apresenta ba monitor AtReS mak hanesan Hari'i Dame iha kontestu mikro no makro ka lokal no nasional.



### Atividade Ne'ebé Halao Husi Ekipa Mediasaun no Rezolusaun ba Disputa (MRD)

- ▶ Fasilita mediasaun kona-ba disputa rai iha Distritu Manututo, Suku Sau. Hanesan kontinuasaun husi mediasaun iha fulan Agostu liuba, tanba momentu ne'e seidak iha rezultadu husi mediasaun ne'e. Iha dia 29 Setembru 2014, iha fatin hanesan, disputante sira konkorda rai refere entrega ba ema ida ne'ebé hela duni no responsavel ba uma lulik ILIUBUS, hanesan mos uma lulik ba disputante sira seluk. Lia nain, lider lokal no comunidade balun sai sasin ba sira nia akordu no promesa atau la iha tan konfliktu kona-ba rai refere.



- ▶ Iha dia 24 to'o 26 Setembru 2014, Ekipa fasilita treinamentu ba membru Rede ba Rai iha Instituisaun, kompostu husi ONG Lokal, grupo comunidade no representa Estudante. Atividade ida ne'e hala'o iha Salaun FOKUPERS Dili. Topiku importante husi treinamentu ne'e mak kapasitasaun membru Rede ba Rai iha area fasilitasaun mediasaun disputa rai ho métodu oinsa halo aprosimasaun oi-oin, etapa importante iha mediasaun no kode etika mediator nian.

### KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendensia husi koleksaun dados monitorizasaun liu husi Sistema Atensaun no Responde Sedu (AtReS) Timor-Leste durante Setembru 2014. Belun esforsu atu fahé informasaun ne'ebé up-to-date no serteza ho dados atual. Hanoin katak, situasaun bele hetan mudansa ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dados ne'ebé ami iha liuhusi sistema AtReS.

**Marilia Oliveira da Costa**, Jestor Sistema AtReS: [bylah.belun@gmail.com](mailto:bylah.belun@gmail.com)  
**Laurensius Lein**, Espesialista Prevençãun Konfliktu: [laurensius.belun@gmail.com](mailto:laurensius.belun@gmail.com)